

籌辦夷務始末

籌辦夷務始末卷之五十四

同治六年丁卯十一月壬申大學士兩江總督曾國藩奏
臣於九月二十三日承准軍機大臣字寄同治六年九月
十五日奉

上諭總理各國事務衙門奏豫籌修約事宜等因欽此仰見我
國家推心置腹博採廣諏之至意欽佩曷任詳繹總理衙門
原摺密函層層商析謀堅執固拒之辭而又不欲大局之
決裂懷雪恥報讐之志而又不欲彼族之猜疑實屬審時
度勢苦心經營臣於豫籌換約一事前接總理衙門四月
之函當飭各關查議開列清單經臣詳細加議業於九月

二十一日。遣派候補道孫士達等二員。由滬進京。齎投。以備採擇在案。茲復荷

諭旨垂詢。臣愚以為與外國交際。最重信義。尤貴果決。我所不可行者。宜與之始終堅執。百折不回。我所可行者。宜示以豁達大度。片言立定。斷不宜若吐若茹。稍涉猶豫之象。啟彼狡辯之端。大抵洋人之在泰西。數百年互相吞併。無非奪彼國商民之利。然後此國可以得志。其來中國也。廣設埔頭。販運百貨。亦欲逞彼蝕劑之詭謀。隘我商民之生計。軍興以來。中國之民。久已痛深水火。加以三五口通商。長江通商。生計日蹙。小民困苦無告。迫於倒懸。今若聽洋人行

鹽則場商販運之生路窮矣。聽洋人設棧則行店囤積之生路窮矣。聽小輪船入內河則大小舟航水手舵工之生路窮矣。聽其創辦電綫鐵路則車驢任輦旅店腳夫之生路窮矣。就彼所要求各事言之。惟挖煤一事。借外國開挖之器。與中國永遠之利。似尚可以試辦。應寶時條約冊內以為可行。臣亦加籤從而難之。其餘如輪船鐵路等事。自洋人行之。則以外國而占內地之利。自華人之附和洋人者行之。亦以豪強而占貧民之利。皆不可行。以上各節。臣於孫士達齋京冊內。逐條籤明。總就小民生計。與之理論。自有顛撲不破之道。如果洋人爭辯不休。儘可告以即

使京師勉强應允。臣等在外亦必以全力爭回。即使臣工勉强應允。而中國億萬小民窮極思變。與彼為仇。亦斷非中國官員所能禁止。中國之王大臣為中國百姓請命。不患無辭置辯。其至因此而致決裂。而我以救民生而動兵。並非爭虛議而開釁。上可以對

天地

列聖。下可以對薄海蒼生。中無所懼。後無可悔也。至請

觀遣使開拓傳教三事。臣派員齎京冊內。皆未議及。伏查康熙十五年。

聖祖仁皇帝召見俄人尼果麥事。其時儀節無可深考。然當日與

俄羅斯議界通市。實係以敵國之禮待之。與以屬藩之禮待高麗者。迥不相同。道光咸豐以來。待英法美三國。皆仿康熙待俄國之例。視同敵體。蓋

聖朝修德柔遠。本不欲胥七萬里之外洋。而悉臣服之也。擬請俟皇上親政之後。准其入覲。其儀節臨時酌定。既為敵國使臣。不必強以所難。庶可昭坦白。而示優容。遣使一節。中外既已通好。彼此往來。亦屬常事。論者或恐使臣之辱命。或憚費用之浩繁。此皆過慮之詞。似應令中外大臣。留心物色。可使絕國人員。儲以待用。不論官階。不定年限。有人則遣。無人則不遣。權仍在我。彼亦斷不至以許而不遣。遂啟兵釁。頃

准總理衙門咨。已奏派志剛等出使西洋。從此源源通聘。使事漸多。縱或有一二不能專對之臣。亦安知無蘇武班超富弼洪皓者流。出乎其中。為

國家揚威而弭患。此可慨然允許者也。至開拓傳教一事。查天主教之始。專以財利誘人。近日外國教士。貧窮者多。彼之利有所不給。則其說亦將不信。自秦漢以後。周孔之道稍晦。而佛教漸興。佛教興於印度。今日之印度。則多從回教。而反疏佛教。天主教興於泰西。而今日之泰西。則另立耶穌教。而又改天主教。可見異端之教。時廢時興。惟周孔之道。萬古不磨。但使中國修政齊俗。禮教昌明。雖百計開

拓亦終鮮專信之者。况各省郡縣。多立教堂。業已拓之無可再拓。將來修約之時。該國如於此條。請請不已。似可許以隨時行文。保護彼教。但不必再添條款。諒不至更肆要求矣。此數端者。其害稍輕。不特不與力爭。並可有求立應。獨至鐵路輪船行鹽開棧等事。害我百姓生計。則當竭力相爭。不設抵制之詞。不用巖峻之語。但以婉言求之。誠意動之。終始不可移易。使彼知恤民以保邦。乃千古帝王之常經。亦我朝

列聖之宗法。在今日中國多事。洋人方張。我不能因曲徇和議。而不顧內地生民之困。卽異日中國全盛。洋人衰弱。亦但求

保我黎民。而別無耀兵海外之心。彼雖僭強詭譎。當亦知真理不可奪。眾怒不可犯。或者至誠所感。易就範圍。區區愚見。是否有當。謹獻芻蕘。以備採擇。

御批。該衙門知道。

甲戌總理各國事務恭親王等奏。同治六年十月二十八日。由軍機處鈔出綏遠城將軍裕瑞等奏。歸化城商民請由恰克圖假道與西洋通商一摺。奉

旨。該衙門議奏。欽此。臣等查新疆各城。自被回匪滋擾以來。商賈流離。貨物壅滯。自應設法體恤。以蘇其困。該將軍據該商所呈。請將向由西路販運之貨。改由恰克圖假道俄邊行

銷。自係變通辦理之一策。但商情雖不可不恤。而邊釐尤不可不弭。伏查俄國創辦陸路通商。祇有恰克圖一口。准其販貨由庫倫張家口徑達天津。出入往來。定有稅則。至塔爾巴哈台等處。向設商圍。本祇每月交易一次。不准任意往來。原因俄境與內地毗連。防範宜嚴。不容稍涉玩視。乃近來俄國東則欲於吉林黑龍江等處通商。北則欲於張家口改設口岸。暢行貿易。數年來要求甚急。均經臣衙門極力駁阻。正所以弭邊釐也。茲該將軍以假道通商。如恐小民無知。生事搆釁。該商等情願查明商販來歷。貨物可行者。方令前往。情甘作保。斷不敢冒昧濫行。似於杜漸

防微。未始不力求把握。惟臣等詳加體察。此中情弊。固在於邊外之易啟別釁。凡在於邊內之任意行走。為患滋多。歸化城與張家口相距不及千里。設令俄人以蒙古地無稅之貨。藉端與華商在歸化一帶。暗地私相交易。是不得於張家口而得於歸化城。其弊相因。其害相等。臣等悉心商酌。西路商已困極。不能不為別開生路。酌量變通。姑准將西路之茶。改由北路出恰克圖一帶銷售。仍俟西疆收復。改照舊章。但必須將茶貨領票出口。不准中途零售。及歸化城附近。私自與俄人交易。如有違犯。商民治罪。貨物入官。應令該將軍傳諭各商。責令出具切實保結。並將販

運究係何等貨物。行走究係何處路徑。逐一訪詢明確。再行酌擬章程具奏。由臣衙門會同戶部。理藩院。嚴覆辦理。至原奏內稱。捐釐充公一節。張家口商民。雖與西商販運之貨各異。而銷售之地則同。近因俄商由內地自行販貨出口。利為所奪。張家口商人。已多歇業。何以西路商人。轉又添出釐金。誠恐不免影射營私。希圖漁利。應令該將軍再行確切體察實在情形。一併覆奏。

御批。依議。

福州將軍英桂奏。竊臣承准軍機大臣字寄。同治六年九月十五日。奉

上諭總理各國事務衙門奏豫籌修約事宜等因。欽此。並承准總理衙門密寄條說前來。臣查泰西各國。惟英法俄三國。勢均力敵。初亦各不相能。而既入中國。遂為一氣。他國又羣相附和。互濟陰謀。始不過貽海濱之憂。今則成腹裏之患。卽如閩省通商各口。先時尚能遵守條約。近於條約之外。每肆要求。雖設法羈縻。而覬覦之心。未嘗稍息。前准兩江總督臣曾國藩咨准總理衙門密函。明歲戊辰年。又屆各國換約之期。今將歷年辦過事件。應沿應革。逐條登答。當經臣飭據通商總局司道。暨各口通商稅務委員。博訪輿情。參稽成案。將通商條約應行的量增刪者。臚列十二條。

又福州廈門臺灣三處通商稅務向經辦過。而此次必須
載明。及嗣後必須杜絕者。分列三十條。造具清冊。分咨曾
國藩崇龢。暨總理衙門察照在案。茲總理衙門豫料各國
換約時。必來爭執者六條。欽奉

諭飭詳細覆奏。臣維洋人請

覲一條。外夷進於中國。自應示以懷柔。第彼既以列國自居。勢難
繩以中國之禮。若准行夷禮。瞻

覲必致失儀。舉止之間。傲慢生焉。且各國公使。近住都城。此端一
開。猶恐入

覲之請。將不以時。待其屢請而後屢拒。則更無辭責阻。為今計出

權宜莫如告以我

皇上冲齡踐位。內外大小政事。悉秉承

兩宮

皇太后主之。惟親責樞臣。得蒙

召見。然尚

垂簾聽政。承

旨傳宣。此外例准引

見人員。僅蒙

欽派大臣驗放。亦未能瞻仰

天顏。此我

朝體制昭然。非為洋人而設。申以名正言順之辭。或可杜其強辯狡爭之口。僕再堅辭固請。亦惟有允俟表

皇上親政後。再當請

旨遵行。又議遣使諸國一條。歷攷史冊。原事所有。惟西洋各國。相距在數萬里外。臣工銜

命。遠隔重洋。不通語言。未諳文字。僅憑繙譯。寄為耳目。難免尤則交爭。卑則見侮。且以中國之人。初入其地。縱能稍通語言文字。而彼中底蘊。我一時詎能深悉。然各國於中華虛實。靡不周知。而中國於外國情形。茫無聞見。豈慮其難通。遂不加諮訪。是就時論事。遣使之舉。亦所應行。惟各國

住京公使。一切事宜。皆其專主。中國非外國可比。今議遣使。不過修好。餘事不能擅專。須先約明。庶免曉瀆。至往返舟車之費。在彼寓館之資。既與通好。自不能惜。應請

飭各省督撫臣。留心延攬通曉外國語言文字。為守兼優者。保送總理衙門考察。以備任使。酌定正副員數。不必假以事權。亦毋須令其專駐。如遣用得人。自不致貽他患。彼亦無所挾持也。又議銅錢鐵路一條。各國但以速傳遞便。貿遷為詞。自圖捷徑。而於中國疆域之險阻。民間之虛墓田地。概置不顧。不知中國情形。與各國迥異。各國地曠人稀。可以開設。中國人稠地密。勢有難行。且民間之田地。虛舍。尚可

價買。而獨至墳墓。則雖重價亦難相強。然彼蓄意已久。似難理諭。勢禁。並恐其明年別啟釁端。巧借名目。即取我中國之財。以逞其陰險之計。現在上海洋場。彼已設立銅綫。既未能先事拒絕。則惟有約以限制。如

畿輔重地。以及通都大邑。皆人烟稠密。萬難准行。即彼欲強為。亦喻以中國之事。必順民情。民所不欲者。

朝廷未嘗強也。此事易滋事端。彼國既通和好。而必與中國人民羣構怨嫌。恐亦非彼國之利。使知眾怒難犯。或可稍緩其謀。其在通商海口百里以內。或准行用銅綫鐵路等事。然仍須民間願賣地基。會同地方官審度辦理。不得有

所強占。庶於籠絡之中。不致有妨大局。又議內地設行棧。內河駛輪船一條。查通商口岸。條約載有一定地方。洋人始踞之於沿海。繼進之於江漢等處。已屬得尺則尺。得寸則寸矣。待彼輪船。攬載中國貨物。使我江海船戶失業。則不可勝數。今復變計愈進。欲就內地開設行棧。若再准其占盡內地生理。立見民生困敝。而包攬商貨。抗納稅釐。更不待言。當此各省用兵。全賴抽釐濟餉。軍需貽誤。其害頓在目前。此不能不以全力拒之。至其內河駕駛輪船。洋人用意與開設行棧。相為表裏。行棧既不可設。輪船自不能行。但利之所在。彼必起而力爭。即難堅拒所請。亦必須令

其按照內地完納稅釐。華商洋商均無異致。蓋各口洋行貨物。本係遵例完稅進口。豈有入於內地而轉不照驗輸完。若謂所設係屬洋行所運係屬洋人。而不完釐稅。則將進口之洋貨。亦曰販自洋人。不納關稅。出口之上貨。亦曰販往外國。不納關稅可乎。此理之明著者。似尚可折服之也。又議販鹽空煤一條。內地食鹽。本列禁於條約章程。而洋人猶敢包庇販私。然在犯禁。尚可執約察辦。設若准以販鹽添入條約。則中國蠶網。立形瓦解。况鹽斤一項。國課所關。民生所繫。即在華民。亦不准人人販運。在各省鹽法。定地行銷。按場網。配引鹽有窩。票鹽有販。地界不容侵

灌民食亦禁越銷。通課販私。則更罪有定律。是

國家之制度。斷難輕議變更。卽如外洋各國。以關稅為國用。必不聽別國之人。亂其成法。現敦和誼。修好通商。當責以己所不欲。勿施於人之義。至挖煤一事。其中窒礙尤多。卽臺灣一處。出產煤斤。洋人蓄心已久。然非近接生番。卽屬地關氣脈。若堪採挖。華民亦早開山。儻准洋人擇地開採。勢必肇釁爭端。彼如堅請。亦惟定以中國向所採煤之內。會同地方官審度。始准設廠雇工開挖。以杜流弊而免爭端。又議開拓傳教一條。各省入其教者。大率無識鄉愚。稍明義理者。鮮有聽其煽誘。惟密令地方官團結紳民。隨時

查察。陽為保護。暗事防維。潛破其奸。漸啟其悟。俾已入教者改悔自新。未入教者相與儆戒。卽聞有誤從其說。亦如僧道之無足重輕。教士縱欲為之開拓。亦將技無所施矣。以上六條。總理衙門先舉其大者重者而言。此外非理之求。不情之請。當不勝屈指計也。卽如本年五月間。英使入閩。經歷各口。先有各處稅釐。欲於換約時赴京商定。概行停收之論。我

朝深仁厚澤。薄賦輕徭。中外共曉。祇以用兵日久。餉需浩繁。疆臣奏議抽釐。亦萬不得已之舉。設使專氣早減。回捻未萌。我

皇上軫念民依。豈不早籌停止。何待該公使從旁置喙。且內地釐金。徵諸華商。而彼尚以為有礙洋商銷貨。藉口銜舌。此外欲圖要挾。從可知矣。就今日度勢權時。通盤籌畫。中國財力兩窮。兵民交困。事有不能不曲示羈縻者。惟是彼以我欲求和。必恃戰以相脅。嚴為之備。以防萬一之虞。此不能不如奕者之占先著也。臣愚以為事前當作思患之防。事後必圖自強之道。大思患之防。當召重兵以入衛。集厚餉以供支。天津為

畿輔咽喉。宜豫徵勁旅。分路扼屯。如現任廣東撫臣蔣益澧。久練軍事。膽識兼優。其所部多敢戰之士。現在粵境教平。

似可早籌布置。此外各路軍營。尤不乏知兵文武。應請

飭各統兵大臣酌舉所知。令選舊部精銳。借防勦擒。臬為名。急趨天津。及附近都城一帶屯紮。以厚集其勢。惟徵調多。則統率須人。責成專庶。事功有濟。並請迅

簡威望素著。中外信服重臣。專駐

京師。節制各軍。聽其調度。使洋人知我有備。不敢肆意憑陵。縱令啟釁。稱兵。亦免猝來之患。所需軍餉。除用兵省分外。應由各省按月分籌解交戶部。及直隸藩署。專款存儲。聽候隨時提撥。一面再請

飭令沿江沿海各督撫臣。實力整頓營伍。其可圍練處所。並令認

真舉辦以期共濟時艱。又自強之道。各省疆臣。慮咸切主憂臣辱之憤。並勵集忱。精修戰具。汰簡師徒。並於用兵之省。力籌平定。騰出制勝之師。分屯以防海口。節此協濟之餉。減釐以紓民力。庶民富兵強。則戰守和之權。在我而不在彼矣。然其要不外用人理財兩端。所謂有人才始有政事。有政事始有財用。我之自強者以此。馭夷者亦以此。

御批該衙門知道。

江西巡撫劉坤一奏竊臣承准軍機大臣字寄。同治六年九月十五日奉

上諭總理各國事務衙門奏豫籌修約事宜等因。並承准總理各

國事務衙門函寄條說前來。臣查洋務之原委。洋人之情
偽。以及行止之利害。准駁之難易。總理衙門條說中。已委
曲詳盡。無俟臣言。臣愚以為請

覲遣使。事屬虛名。姑約緩期。洋人當不固執。洋人所重者利。所畏
者民。前此就款。自知非仗

朝命。無以制中國之民。圖中國之利。若如銅錢鐵路。販鹽挖煤。與
夫內地設行棧。內河駛輪船等事。是專吾利以毒吾民。而
慮民之羣起為難。即現有之利。亦不可保。故欲增入條約。
以脅地方。其議若行。中國由是坐困。譬人一身。膏血既盡。
則軀命隨之。尚可待異日補救乎。如理喻勢禁之兩窮。惟

批卻導竅之一法。蓋泰西各國。惟英法馬首是瞻。其圖利以英國為甚。其畏民亦英國為甚。現在通商口岸。類皆英商不惜糜費。極力經營。置頓貲財。曷啻億萬。是皆百姓所耽耽者。一旦眾怨並興。獨英人深受其害。屆時先遣智辯之士。密以禍福諭之。可息其貪志。又密諭法人以上各事。有益通商。無裨傳教。何必同聲附和。以失中國之歡。各省教民甚多。事敗豈有瓦全之理。是亦勢所必然。天誘其衷。庶幾見聽。則英國與各國。必不敢於紛紜。而依國亦勢孤無與矣。至於傳教章程。亦祇可仍其舊。設官約束。轉以奪州縣之權。彼既恃有護符。殊非中國僧道可比。儻洋人所

求必遂。各國之交莫離。目下計在羈縻。自不能不允以一
二事。則誠如總理衙門所奏。網維在內。實事在外。各省大
吏。因民向背。以用剛柔。萬一不能調停。則請立于重鎮。以
塞洋人之口。而後徐為之圖。洋人或亦知難而退。然此皆
彌縫之術。仍恃筆舌以爭之者也。夫洋人之志叵測。而欲
難盈。自非思慮豫防。將何以支大敵。總理衙門慮及決裂。
務須共為之備。誠為綢繆之至計。惟是決裂之禍。外省遲
而小。都門速而大。都門苟有疏失。外省無所適從。神機營
兵力尚單。恐不足以資防範。為一時計。似宜豫徵勁兵。以
備非常之變。為萬世計。並當多練禁旅。以立不拔之基。旗

緣官軍十數萬人。其中豈無壯健。果能慎揀將領。精選偏裨。加意拊循。極力振頓。則怯者未始不可轉為勇。贏者未始不可轉為強。久暫安危。實繫於此。直隸為

畿輔重地。督臣劉長佑老於行間。自應責成訓練各軍。嚴守要害。以資拱衛。以外沿江沿海。其應如何措置。則在各督撫體察情形。江西惟九江一面當洋人之衝。彼若深入內湖內河。則我易於掎角。惟留防水陸各勇。合計不滿萬人。應視時事如何。再議增募。江楚用兵日久。從容號召非難。如須江軍入衛。

京師請

旨先期下。臣。以便早為料理。利鈍雖難逆觀。勝負要亦無常。幸而得以羈縻。固屬

國家之福。不幸至於決裂。則賴

宗社之靈。臣不敢矯持以誤大局。亦不敢恇怯以便私圖。謹就管見覆陳。

御批。該衙門知道。

乙亥。三口通商大臣兵部左侍郎崇厚奏。疊奉寄

諭。將豫籌修約事宜。各抒所見。妥籌覆奏等因。欽此。又准總理各國事務王大臣。開具條說密函前來。均詳加參酌。反覆籌維。各國照約辦事以來。察其情形。往往以約內所載。尚未

能盡如所願。茲屆修約之期。必將多所要求。總以於彼甚便。而不顧我之。是否能行。愈加開導。其志愈堅。性情狡執。而其意中之事。一則以體制爭勝。一則以利柄爭先。其官員在中國年久。往來京都。風俗日漸熟悉。其性情默化。潛移。誠恐中國藐視。不能自比於上邦。其商人日來日多。彼此爭利。漸至無利可圖。是以各處探尋。欲盡奪中國商民之利柄。雖不至再啟釁端。必將大費唇舌。總理衙門王大臣思之已熟。諸中窳要。為今之計。竊以為宜示之以寬大。鼓之以信行。而一切瑣屑漁利窒礙難行之事。仍應力爭以存限制。謹就條說內管見所及者。臚列上陳。伏候

聖明採擇。

一議請

觀自古中國與外邦交際。其道有二。一則曰朝貢。一則曰聘問。三代隆盛之時。外邦獻琛納賚。重譯來庭。經籍昭垂。班班可考。此朝貢之正軌。不易之定程也。迨夫兩漢。北漢諸邦。雖叛服不常。而使命交通。亦未聞有斷斷先議及謁見儀度之事。唐室中葉。以迄五代。沿至中國多事。每借助外邦兵力。以平內難。而外邦之勢漸張。一切交際儀節。歧途雜沓。辯論滋紛。誠如總理衙門王大臣所謂儀節變更。未足為訓者也。至於春秋列國。尋盟修好。使命往來。而書文車軌。

同此幅員。揖讓冠裳。共茲制度。尊卑有一定之分。等差無可議之文。故稽諸史冊。節目儀文。皆非今日之可比。秦西諸國。大小不齊。而遠居海外。自據形勝。兵力足雄。夜郎自大。大抵相同。而其言語文字。儀度設施。自為國族。迥不與中國相伴。既非朝貢臣服。初無聯絡聘問之道。徒以招徠互市。麇集邊境。近年來我郊多事。吁引朋類。偏處京邑。居然成一敵國。近處肘腋。已成投鼠之勢。且彼族猜刻性成。志復堅執。陰欲窺攬權稅之利柄。陽則必爭敵體之虛文。蓋以體統不尊。則終受表符制。不能任所欲為。其近年毒蝕鴟張。視十年前。又不啻倍蓰。况包藏禍心。積慮陰謀。毒

之已熟。所以首以請

觀為詞。而堅索昔年所求未獲之條也。我

國家政崇寬大。曲示懷柔。凡可以權宜俯允者。仍可與之羈
縻相安。初未嘗有鄙夷薄待之意。而彼且爭之愈力。積念
日深。牢不可破。非言語文字所能開導。竊以為苟非隱憂
實害。與其待彼力爭而後許。莫若我順機而俯從。雖屬創
行之典。仍垂格外之

恩。惟許之之中。必裁以限制。其使臣入

覲之儀。必應妥議入

覲之期。必待

皇上親政之時。彼亦無所再用其鏡舌。但既非朝聘。又無貢品。似未便與表。

朝越南琉球緬甸修貢諸邦。該近年一貢同例。且可以杜其後此之煩瀆也。

一議遣使。西洋各國。近年各遣使臣。分往中國。與總理衙門及外省大吏文牘往來。會晤抗禮。以通款洽之情。而盡交際之道。此蓋數十年前苦索力爭。而今始得行之者。其所以必請中國亦派使臣。赴各國駐紮。初不過求敵體平等之意。似尚無隱謀叵測之心。而事則實多窒礙難行。總理衙門以各國至中華通商傳教。有事可辨。中國並無赴

外國應辦之事等詞駁之。實足令彼無詞以對。才通盤籌度。尚有足以暢其駁之之說者。外國商人赴各處貿易。其售貨有稅。其船隻有稅。其官民受俸受雇。值有抽釐。國中無地丁。而抽收取盈。且數十倍。故各使住紮各口。公使歲金以萬計。隨員歲金以千計。而盤川及雜費。稱是。每歲每口耗數十萬金。而取之裕如。其派遣選材。則皆習嫻於平時。或循資而擢用。或樂於趨事。以為榮而不以為苦。且行之歷年。皆有定章。今我遣使。事屬初創。隨員僕從。多則所費奢。指揮輿馬。簡則體統衰。非僅旦暮之權宜。責能行之久遠。則經費宜豫籌備也。使臣至彼。必一二年後方能與

其人地稔熟。若數年更換。則新手苦於生疏。若久任不遷。則遐荒且憂閭絕。奉使循資以保充。平日講求於嫻習。則人材宜豫為選儲也。經費一節。或當招徠商賈。與使臣相輔而行。然商人貿易。有利則踴躍爭先。無利則觀望裹足。數萬里商情之衰旺。亦難豫料。事雖不可緩置。然亦難以倉卒行。今宜允之。或期諸軍務肅清。或待諸度支稍裕。計非數年以後不可。至表使臣到彼。尚有交閱。

諭旨一節。其謁見彼君主之儀。亦應先為議定。

一議銅綫鐵路二事。俄國南境。與中國北境。壤地相接。其包藏禍心。蓄謀尤深。而英法美三國。從而和之。於中國毫

無所益。而徒貽害於無窮。似宜始終堅持而拒之。開誠布公而告之者。惟既經總理衙門王大臣以失我險阻。害我田廬。及占民間生計。眾憤難當等詞折之。上海亦有七不可之說以駁之。是駁之既以盡詞。而彼悍然不顧。事在必行。換約之時。更難置喙。但中國此時寇氛未盡肅清。軍務省分險隘未盡解嚴。昔年英法等國。欲於蘇松漢口九江等處通商。已義和約。亦尚有待肅清收復之說。今此例似尚可援。且事關各省要隘。官民是否願行。應由各省地方官紳士庶公議。詢謀僉同。方能定議。是行止之權仍在我。以此為緩圖。彼雖不能即此甘作罷論。亦斷不至因此遂

至決裂。惟拒英法美尚易。而拒俄較難。緣俄蓄慮尤深。而陰謀愈險也。

一議內地設行棧。內河駛輪船。查外國商人有利必趨。不遺餘力。此二事若允其所請。將來得步進步。流弊不可勝言。總理衙門王大臣等所議。深為洞悉一切。通商口岸舊約章程。所以與洋商者。不為不便。若再多生枝節。實為無厭之求。必須堅持定見。不可准行。

一議販鹽完煤。蓋鹽笑大政。為

國家完餉。課餉攸關。且為民生日用所必需。其利尤溥。是以設官分職。責有攸司。越澆私販。盡棄作弊。實已防不勝防。

其近來上海漢口一帶。有雇輪船拖帶鹽船。尚係貧困雇
值。未及挽擾鹽政。若條約內准外商興販。則偷漏私賣。壟
斷居奇。流害且不可勝言。至挖掏煤斤。勢必連及金銀銅
鐵等礦。諸弊叢興。各處礦丁。良莠不齊。人數眾多。乘則食
力。散則為匪。每釀巨案。若有外國人為之包庇。易聚難散。
尤不可不慮。總之此條既為昔年和約所未載。值今換約。
嚴詞堅拒。亦不至為此決裂。所宜痛絕。其今日之妄想。而
前其他日之萌芽。但販鹽出於彼族圖利。不過如欲入內
河。按求中土物產之故智。而煤斤則為伊等目下所亟需。
較鹽尤切。輪船需煤。若將來銅鐵鐵路成。需煤愈奢。邇來

外國輪船輪車一切器機。奇技繁興。聞各國近年挖煤。有入地數百里。時逾數月。而未究其底者。是用煤日廣。而挖煤之技。且憂漸窮。欲借助於中國也。若銅錢鐵路之舉。不果行。則挖煤之計。亦可弛也。

一議開拓傳教。此條既為和約所載。此時固難裁禁。傳教之徒。法美二國為多。英俄次之。惟其教士類多鄙俚淺妄。兼施小惠。僅可煽集鄉愚。萬不能波染讀書明理之士。其教自在。聽之尚無大害。但無知鄉愚。及刁狡小民。恆藉其包庇。抗糧架訟。種種不法。其教士喜於虛文體面。拜晤地方官。以為榮。其違僻拘泥之地方官。或拒而不見。或見而

控抑之皆非善處。此輩之道。其實此輩中尚有曉事和平之人。轉託其拘管開導教中愚民。亦不致生事。及生事而尚能消弭者。是在善導而撫綏之。亦無礙政體也。總理衙門王大臣議。以如僧道之例。設官以治之。最為得宜。若慮天下以引人入天主教為口實。則今僧綱道錄司編各省。未聞有引人入釋道教之請也。總之處置責於得宜。日久習熟。轉可相安無事。入教之鄉民。愚蠢癡妄。則有之。若逞兇為匪。尚無我。

皇上一視同仁。番回僧道。各有其教。同在化育之中。

聖化覃敷。何所不容於覆幬也。

以上各條。或為各國所共爭。或為一國之專利。情形不同。其用心亦不一。考歷年以來。與之交涉。隨時體察。雖狡執百端。若平心以理服之。亦尚可制其驕矜之氣。總理衙門王大臣等所論各節。為未雨綢繆之計。使臨時辯駁。成竹在胸。誠為勝算。所以維持大局者。當在此舉矣。

御批。該衙門知道。片併發。

崇厚又奏。再。考自辦理通商以來。隨時體察情形。現屆修約之期。通盤籌度。尚有三事。於大局甚有關係。務須杜漸防微。先事豫籌者。敬為表。

皇上密陳之。

一稅務司不宜於修約內出名也。查稅務司之設。創之於廣東上海。當時不過為監督官雇用之人。迄至咸豐十年換約以後。經前工部侍郎恆祺會同李副調赫德。原以洋商徵稅等事。各監督初辦。恐多棘手。用以藉資稽查。於是稅務司遂為官用之人。職司稽查稅務。數年以來。總理衙門再三整頓。於稅項大見起色。實係用稅務司之力。惟因李奉國驕悍性成。立予罷斥。中外洽然。及赫德為稅務司。將任用稅務司之權。歸於稅務司。監督不能去取。各口監督。又因隨時換任。情形不熟。多有將稅務事宜。專委之於稅務者。因而各口稅務司之權日重。洋商但知有稅務司。

而不知有監督矣。稅務司乃因中國應有之權。而據為己有。明理者尚安本分。倚勢者任意把持。現屆修約之期。心存壟斷。願辦銅綫鐵路。欲竊中國之權。而與洋商謀利。應請於現修約內。無論何款。不可有責成稅務司字樣。則沿海利權。不致移於外國。洋商知稅務尚無真權。銅綫鐵路。即無人辦理。此政體所關。實防微之要議也。

一洋藥稅則。不宜加重也。查從前各鈔關稅務則例不同。章程不一。原係各就地方情形而定。自各國通商以來。所定稅則。均係不再重徵。單照紛繁。流弊已不可勝言。內地稅關釐卡。大為減色。近年來所恃者。惟有洋藥一項。條約

內載明不准外國人包送。可以任憑重徵。每年稅項釐金數百萬兩。而各洋商時時以此為不便。開會開其議論。皆云洋藥之稅。尚可加重。統歸不再重徵之例。卽稅務司亦屢屢言之。現在修約。彼必以情願加稅為詞。冀我允從。以便定不再重徵之例。儻若允准。不惟各釐卡之餉源告竭。卽內地設行棧內河駛輪船二事。亦皆因洋藥而起爭端。應議約時。持定通商稅則第五款所載。嗣後遇修改稅則。仍不得按照別貨定稅之語駁斥。不致洋商包庇護送矣。一茶稅不宜減輕也。查稅則內載。茶葉每百斤稅銀二兩五錢。若以值百抽五之例繩之。細茶至昂之價。每百斤不

過值二三十兩。降而十餘兩。數兩不等。卽以至貴者論之。亦不止值百抽五。則是茶稅本重。而何以原定時各國並無一言者。蓋因從前粵海通商。徵收茶稅。連正項並雜費。收至八兩有餘。茶船出口。又有限定斤數之禁約。嗣後一改而為二兩五錢。雜費一切刪除。各洋商自欣然樂從。及至俄國後定陸路稅則。力爭茶稅。懇求減少。與之爭論。幾乎舌敝唇焦。僅允其將販茶一項。改為六錢。並聲明別種茶葉。均照舊例。現在各洋商又時時有求改茶稅之意。議約時在所必爭。彼不過以茶葉之價值甚少。於值百抽五之例不符為詞。不知稅則各有用意。不能專以價值論稅。

英吉利前數年間用兵之時。該國茶稅曾加至四十兩。彼
又將有何說。彼必飾詞巧辯。以稅減可以鼓舞商情。暢旺
稅課。雖少實多為詞。不知土地之出產有限。民間之食用
難增。此說尤不可信。總之茶稅一項。為各關之大宗。若輕
於議減。則百萬之款。立見消耗。應請查照俄國續增稅則
內。甄茶以下註明別種茶葉稅則。不得援照此例。庶不致
茶稅另生異議矣。

以上三條。皆有關大局。自應先事豫籌。杜漸防微。銅錢鐵
路。為稅務司所願辦。藉以攬權。洋藥茶葉二事。均與內地
設行棧。輪船入內河相連屬。得於彼必爭於此。皆有礙於

國計民生。管見所及。理合附片密陳。

御批覽。

崇厚又奏。前准總理各國事務衙門咨開。豫籌明歲條約各事宜。奏請由南北洋通商大臣。於平時辦理洋務各員中。擇其熟悉情形。通達政體。兼工才辯者。每處選派二員。以備查詢一切。藉資得力。奉

旨。依議。欽此。才當於歷年隨辦洋務委員內。選派知府銜候補直隸州涞水縣知縣黃仲龔。運同銜同知用分發廣東候補知縣高從望二員。咨送總理各國事務衙門。聽候差遣。

御批。知道了。

內子總理船政前江西巡撫沈葆楨奏。船政提調布政使銜福建補用道胡光墉到工。臣以其慮事周詳。復將修約事宜訪之。據稱

聖主洪福。明年修約。必不至遽啟釁端。蓋鴉片方持。不遑他顧也。法郎西與普魯斯壤地相錯。爭界構兵。英與法鄰。恐法滅而及己也。故不得不助法。俄與普鄰。美又與俄鄰。恐普滅而遑及之也。故不得不助普。近日各國商賈。蹤跡漸稀。職是故耳。洋人以商為重。聞洋商之在上海廣東者。豫請於其節。以前約中每貨值銀百兩。完稅五兩。內有數則應減者。洋貨入內地。既完稅。又納釐。或免或減。到期應議等情。

若所議止此。甚易辦耳。然夷情詭詐百出。雖力不足以陵我。必有恫喝之詞。如請

覲遣使諸條。揆勢度時。俱屬費手。而鐵路之害為尤甚。大半皆久居內地之洋人。與內地之通事。窺我虛實。挾以相難。

國體民生所繫。固不能盡徇其欲。以啟戎心。卽悚以空言。亦於事何補。竊思

國家臥薪嘗膽。收效尚待數年。養晦避時。正在今日。彼洋人所圖者利耳。無所利必狺狺然羣起而爭。得所利則弭首而受我鞭策。與其逐條駁詰。脣焦舌敝。終不能不委曲以求全。何如扶其隱衷。使之就我範圍。不敢別生枝節。前者

劃四成稅餉。償其兵費。原謂安民息事。出於一時之權宜。此次修約屆期。可否示以

天朝寬大之恩。仍於新關結款內酌量劃分成數。助其不給。其餘所有條約。仍照原議。不得一字加增。該酋等本有內顧之憂。既飽所欲。當無異言。雖所費不為不多。較諸各款之窒礙難行。傷我

國體。因我民生者。所全亦不少矣。至於我實有可恃。則

詔諭停止。一反掌間耳。又非若鐵路等事。一成而未易變者也。臣察其議論。尚非毫無定見。空言搪塞者。是否有當。理合恭

摺密陳。

御批該衙門知道

丁丑福建臺灣鎮總兵官劉明燈奏竊於八月十三日由郡起程十八日抵枋寮查詢前途盡屬番界聞有閩粵之人零星分處以生番伺殺無常恆有戒心且其中菁深林密鳥道羊腸又多大石嵯峨礙難下足素為人跡所不到之區當卽分派員弁督率民夫將枋寮以下一帶山路樹則芟之道則平之先後就地添募勇丁並各給予旗幟分紮各莊看守堵禦兼作鄉導於二十五日由枋寮統師水陸並進間遇路徑險窄每日身先士卒步行二三十里沿途經過各莊及附近番社皆出迎接並獻雞豚酒米一

概卻之宣布

皇仁。分別賞給番銀銀牌羽毛紅布料珠等件。各社番俱各歡欣感戴而去。才抵椰橋後。駐紮紫城。前署鎮臣曾元福及署臺防理番同知王文啓。合眾國領事李讓禮等先後到地。訪查龜仔角生番。尚據椰橋四十餘里。地勢險要。傳集各莊頭人來見。詳加詢問。據稱內山地方。共有十八番社。其負嵎恃險。以龜仔角為最。而其兇惡殘忍。亦以龜仔角番為尤。平居互稱雄長。夜郎自大。迨至酒酣。輒拔刀相向。雖父子兄弟。亦所不顧。習俗使然也。該番戕害洋人之後。知為法所不容。早已加意隱防。雖不與熟番人等往來貿易。

祇邀十七社番飲酒要盟。意圖抗拒。而各社生番。屈於威
加。類多勉強。允。但得番目卓杞篤前往宣諭。散其黨與。
勦辦不難得手。才竊思奉委查辦此案。祇期孳獲兇番數
名。盡法懲治。卽可以謝洋人。今該番負固不出。既無綫路
可通。復敢要結黨援。妄逞螳臂。若不大張撻伐。不足以儆
兇頑。當與道臣吳大廷等往返函商。意見相同。一面會同
前署鎮臣曾元福。稟咨督撫臣。先令臺防理番同知王文
榮隨營委員候補從九品王懋功留閩浙補用副將張達
春儘先補用遊擊本任斗六門都司林振舉等。分赴各番
社妥為安撫。才卽於十五日拔營進紮龜鼻山。臣該番稟

穴不遠。正與前署鎮臣曾元福訂期分路並擊。十六日據
准李領事照會。內稱十三日帶領通事吳世忠及閩粵頭
人親赴火山地方。途遇該處總目卓杞篤面議和約。嗣後
船上設旗為憑。無論中外各國商船。如有遭風失事。由該
番妥為救護。交由閩粵頭人轉送地方官配船內渡。償若
再被生番殺害。閩粵頭人轉為幫拿。究番解官從重究治。
此次起得女洋人頭顱及照影鏡。係該領事自向贖回。所
費銀圓。照數歸還。其餘屍身。已被該番先拋入海。此外並
無被擄未害洋人。無從釋放。該領事恐其結怨。業已允從
願為和息。並代該番照請撤兵。懇免深究等由前來。李伏

查此次羅妹船夥。被生番所殺。並非無因。祇緣五十年前。龜仔角社生番。曾被外國洋人登山酷殺。幾無子遺。以致世世挾仇。希圖報復。此條番目卓杞篤向李領事面言。似屬可信。考察看此間海道。生成天險。礁石林立。利如鋒刃。其中暗伏沙綫。尤難窺測。設或風帆不順。船隻到此。無不立碎。况該番與洋人。有不共戴天之仇。前此乘危截殺。原為報復起見。今若代其勸解。誠恐洋番讐怨。愈結愈深。從此讐殺相尋。永無休息。現既據該領事等兩願和好。盡解前隙。似宜網開一面。用彰我

皇上寬大之恩。當卽飛函密與道府熟商去後。十七日復據李領

事親至大營。面見岑求為和息。言詞愈益懇切。不得通融辦理。俯如所請。飭傳聞粵熟悉頭人。立具保結。一面妥議章程照覆。並將代為追回量天各千里鏡。及該領事前去贖價番銀一百圓。由岑先行發還。該領事甚為感激。惟現紮營盤。據該領事照請暫留。俟其到省申陳督撫臣。可否准予改設礮臺。另奏請辦理。現酌派兵丁及該處莊丁看守。並留行營礮二尊。以壯聲威。岑於十九日回至瑯嶼內山。各社生番。經王文榮等撫諭之後。仰忱

聖主恩威。均各相率來見。復經岑開揚

德化。優加犒賞。莫不以手加額。喜出望外。岑抵瑯嶼後。立將募勇

裁撤其應需員弁兵勇薪水口糧夫價船價賞號等項。除臺灣府先後解來番銀一萬三千四百兩。分撥曾元福王文學兩人支應外。尚有不敷。業由^李就近籌借發給。事竣襄實報銷。絲毫不敢冒濫。一面將辦理詳細情形。稟由督撫臣察覈具奏。並俟李領事回廈。^李始行起程。於十一月初一日回郡。

御批。該衙門知道。

戊寅總理各國事務恭親王等奏。伏思自古中外相交。遣使往來通問。載在史冊。使臣將命。必有國書。以達彼此之情。亦屬一定儀制。此次蒲安臣奉

派前往有約各國。自應查照舉行。惟中外禮節不同。若令親遞。誠恐將來不免流弊。是以臣等屢經公同商酌。尚未定議。旋據柏卓安述及外國彼此遣使。以國書為憑信。設令此與缺如。誠恐各國以禮意未通。於辦理交涉事宜。必多不便。轉致蒲安臣臨時無所措手。諸多為難。臣等細釋其言。實近情理。溯查從前英國與比國使臣。來至中華。曾經攜帶國書。或由督撫接收。或由臣衙門接收呈遞。並未准令親遞。隨後

頒發國書。亦由承領之衙門轉給。載在檔案。近年外國派使來往中華。聞亦各帶國書。因未准令親遞。僅止錄出原文送閱。

或並不進閱。臣等付之存而不論。正所以防流弊也。今蒲安臣出使。雖未便停止。

國書。致令各國生疑。尚可援照英國比國之案。於到外國後毋庸親遞。以防流弊。因以此意與柏卓安面為約定。並擬給蒲安臣咨會。欽明奏。

頒國書。應仿照從前英使等在京成案。令蒲安臣每抵一國。即將國書由該處執政大員代遞。且言明將來有約各國。如有國書。或由該使臣齎回。或寄交往京使臣轉呈中國。亦即照此辦理。豫為地步。又慮及泰西各國。向有優待使臣之處。另行咨會蒲安臣。凡有妨礙。

國體之事。不必舉行。誠以遣使本以達情。今蒲安臣以洋人俾充茲選。似於中外交涉之件。藉可迎機而導。就我範圍。且同往。又有中國官員。諸凡商酌而行。於將來一切。可望稍有裨益。如蒙

俞允。再由軍機處查照從前

頒發圖書成案辦理。

御批。依議。

給蒲安臣咨會

為咨會事。案照貴大臣奉

命出使有約各國。辦理中外交涉事務。按程前進。美國係先到之

邦。從前美國與中國聯和。曾經兩次由出使大臣。交中國大臣代遞國書。彼時因中外儀節不同。是以斟酌權宜。於中外

國體。兩無妨礙。辦法最為妥善。今貴大臣出使美國。仍可按照前式辦理。茲本王大臣奏請

欽頌國書。交貴大臣恭齎前往美國。希即仿照從前美國使臣在中國由大臣代遞國書之禮辦理。惟現在有約諸國。均各和好日敦。自應一體奏請

欽頌國書。由貴大臣恭齎前往。每抵一國。亦可照在美國辦理之式。由貴大臣交其國大臣代遞。以歸一律。此係本王大臣

查照舊案。斟酌辦法。將來有約各國。如有國書。或由貴大臣齎回。或交住京各大臣轉呈中國。亦即照此而行。庶乎儀節不致參差。而睦誼亦昭輯洽矣。至於貴大臣前往有約各國。與現在法英諸國大臣住京者等級無異。將來在美、國及別國。如有欲照泰西之例優待者。貴大臣不能固卻。即亦不為遙制。但務須向各國豫為言明。此係泰西之禮。與中國體制不同。因中國無論何時。國體總不應改。不必援照辦理。不得不豫為聲明。相應一併咨會貴大臣查照可也。

給蒲安臣咨會

為咨會事。現在貴大臣既經奉

命為中國使臣。將來到各國時。凡有如中國禁地。及一切妨礙

國體之事。仍望貴大臣亦照中國體制。不必舉行。以昭肅敬。各國之意。其或各國因貴大臣係泰西之人。照泰西例優待。亦希貴大臣將中國體制。先為聲明。庶將來各國不致疑中國無報施之禮也。

新編夷務始末卷之五十四